

**PENGUMUMAN PENERUSI MAJLIS BAHASA MELAYU SINGAPURA (MBMS)
DI FACEBOOK, 14 APRIL 2020
RANCANGAN KERJA MAJLIS BAHASA MELAYU SINGAPURA**

MEMIKIR ULANG INISIATIF-INISIATIF MBMS

1. Dalam sesi pelan kerja MBMS dalam bulan Januari 2020, anggota-anggota MBMS telah memikir ulang inisiatif-inisiatif MBMS supaya dapat membawanya ke peringkat yang lebih tinggi.

ANUGERAH GURU ARIF BUDIMAN (AGAB)

2. MBMS merancang untuk memanfaatkan ilmu, kemahiran dan kelebihan penerima-penerima AGAB untuk masyarakat. Dalam tahun-tahun yang berikut, MBMS merancang untuk mengalakkan penerima-penerima AGAB menggerakkan dan menganjurkan acara-acara kebahasaan mereka sendiri, untuk guru-guru Bahasa Melayu yang lain.
3. Para Penerima AGAB juga digalakkan menjadi nara sumber kepada pertubuhan-pertubuhan yang ingin melestarikan bahasa Melayu. Ada dalam kalangan penerima-penerima AGAB sudahpun giat menyumbang ilmu dan kemahiran mereka kepada MAEC-MAEC yang menganjurkan Bulan Bahasa. Untuk memastikan ini, penerima AGAB boleh menghubungkan penerima AGAB dengan pertubuhan-pertubuhan dalam kawasan perumahan mereka supaya dapat bekerjasama.

PERSURATAN

4. MBMS akan menilai kembali peranan dan bentuk Anugerah Persuratan. Anugerah Persuratan akan terus memberi pengiktirafan kepada karya-karya penulis Singapura dengan pengubahsuaian pada kategori-kategori yang dinilai. Anugerah Tun Sri Lanang, Anugerah Harapan dan Anugerah Anumerta akan dikekalkan yang diiktiraf dalam Hadiah Persuratan.
5. Sumbangan Singapura dalam perkembangan sastera di rantau Asia Tenggara melalui keanggotaan Singapura dalam MASTERA akan dibangunkan dengan mengukuhkan kerjasama badan-badan setempat dan Institusi-institusi Pengajian Tinggi.
6. Untuk terus melestarikan kegiatan dan perkembangan kesusasteraan, MBMS merancang untuk memupuk generasi pelapis, memperkenalkan inisiatif Sahabat Sastera bagi mengenal pasti dan memupuk bakat-bakat muda yang berminat menulis. Rakan-rakan Bahasa boleh disalurkan ke program Sahabat Sastera supaya sebuah laluan dapat disediakan untuk belia-belia Singapura yang cenderung dalam isu-isu bahasa dan kesusasteraan. Pada jangka masa yang panjang, diharapkan belia-belia ini dapat menjadi pelapis yang menerajui kegiatan-kegiatan persuratan MBMS seperti MASTERA.

BULAN BAHASA

7. Penilaian semula Bulan Bahasa telahpun dilakukan pada tahun 2019. Tema Bulan Bahasa telah dikemaskinikan dengan 'Cita, Citra. Cinta. Bahasa Kita.'. Pembaharuan tema ini bertujuan untuk menyuntik kesegaran dalam semangat dan usaha masyarakat Singapura memekarkan dan melestarikan bahasa Melayu.
8. Bagi tahun 2020 dan ke depan, MBMS mempunyai rancangan untuk meluaskan golongan sasaran Bulan Bahasa. Usaha melestarikan bahasa tidak terhad kepada golongan pelajar ataupun guru sahaja. Usaha ini harus melibatkan semua golongan masyarakat termasuk keluarga, belia (terutama sekali belia yang di luar lingkungan sekolah) dan golongan pelajar.
9. MBMS juga sedar akan perlunya generasi pelapis untuk meneruskan usaha melestarikan bahasa. MBMS merancang untuk dapatkan pelibatan Rakan Bahasa yang berterusan, walaupun pelantikan mereka sudah berakhir. Rakan-rakan Bahasa yang lepas boleh menyumbang kembali kepada Bulan Bahasa dalam kegiatan-kegiatan Bulan Bahasa ataupun Rakan Bahasa yang dianjurkan.
10. Sama-samalah kita membangunkan bahasa, sastera dan budaya Melayu agar tetap relevan dalam kehidupan kita di Singapura.